



Republik Ayiti

# AKADEMI KREYÒL AYISYEN (AKA)



## AKADEMI KREYÒL AYISYEN NÒT POU LAPRÈS

Akademi Kreyòl Ayisyen (AKA) salye tout popilasyon ayisyen an, an jeneral ak manm laprès yo, pi espesyalman.

Nou tout rekonèt peyi Ayiti ap viv yon sitiyasyon kriz san pye ni tèt ki soti pou li fini ak fanmi nou yo, dekonstonbre sosyete nou an, depatcha enstitisyon nou yo, kraze tout sa ki reprezante baz idantite nou kòm pèp, epi lage sistèm edikasyon ayisyen an atè plat. Sitiyasyon vyolans ak ensekirite jeneralize sa a tèlman kenbe nou nan gòjèt, nou prèske pa gen tan pou nou reflechi sou lòt pwoblèm enpòtan ki menase lavi peyi nou, ansanm ak avni jenerasyon ayisyen ki ap vini dèyè yo, paske nou ap viv nan yon kontèks kote : **si nou wè jodi, nou pa konnen pou demen.**

Se nan konjonkti sa a, Akademi Kreyòl Ayisyen an, yon enstitisyon Leta endepandan ki ap travay pou lang kreyòl ayisyen an jwenn plas li merite nan sosyete ayisyen an, epi ki angaje li nan batay pou respè dwa lengwistik pèp ayisyen, salye desizyon Minis Edikasyon Nasyonal ak Fòmasyon Pwofesyonèl la, mesye Nesmy MANIGAT, pran nan dat 21 Fevriye 2022 a, nan okazyon selebrasyon 23<sup>èm</sup> Jounen Entènasyonal Lang Matènèl la, **pou Ministè Edikasyon Nasyonal ak Fòmasyon Pwofesyonèl pa sibvansyone ni soutni okenn materyèl didaktik ki pa an kreyòl, pou aprantisaj elèv yo, soti nan premye ane pou rive nan katriyèm ane fondamantal.**

Pou Akademi Kreyòl Ayisyen, desizyon Minis Edikasyon an dwe ankouraje:

- **Aprantisaj elèv lekòl ayisyen kòmanse nan lang kreyòl la: lang matènèl yo, epi sèl lang pi fò nan yo konnen deja;**
- **Otè, editè, ekiven, didaktisyen ak pedagòg pwodui tout kalite liv an kreyòl, espesyalman pou nivo premye sik fondamantal la, kòm zouti pou aprantisaj elèv lekòl yo pi byen fèt;**

- Kominote edikatif la respekte dwa tout aprenan ayisyen genyen pou yo kòmanse epi rapousuiv fòmasyon akademik yo nan lang yo, kreyòl ayisyen, sèl lang yo pale a, sèl lang yo konprann nan.

Pou ede desizyon sa a pi byen chita toujou, Akademi Kreyòl Ayisyen pral pibliye dezyèm **rezolisyon sou Òtograf Kreyòl Ayisyen an**, anvan lontan, yon fason pou pèmèt tout moun gen zouti referans estanda nan men yo pou yo vini pi maton nan ekri lang kreyòl ayisyen an kòrèkteman.

Akademi Kreyòl Ayisyen ap kontinye travay nan tèt-ansanm ak tout lòt enstitisyon Leta kou prive pou drapo lang kreyòl nou an kontinye flote pi wo tou patou kote Ayisyen ap viv, kit se isit, an Ayiti, kit se nan peyi etranje.



**17 Mas 2022**